

HIBRU

O kiun vēh to nō non po Jiu' varih to vaman ne e Ieesu' Kristo. A ēhnan o to pee, nee to poka' ne o Hibru. Ivēh, ka se popoka' no raoe a napan va Hibru, pa ö na se keh vavato suk no raoe. Ivēhkēk, manih po kiun pamēh na to hikta nat no pa te' to kiun voh.

A napan va po vaman varih Hibru to iu hah voh e ne pa ö hin hin moaan vavoh pee, suk e'e to tataum voh ne a ma punis manih pa ma vakihat pe Ieesu'. Ivēh, ke tökiun po kiun vēh to vavaasis non na raoe pan, e' to vih non, pee se koe a ö hin hin moaan vavoh pee. Ka manih pe Ieesu' varoe kuru, nee se tavus o te' totoopin manih pa matan e Sosoenēn. E Ieesu' rakah e Koa' apuh pe Sosoenēn. Ivēhkēk, manih po ankero', me a ma te' vanēnēn soe pe Sosoenēn, me e Mosēs, ee to hikta te' apuh tiroē' ne. Me e' to vavaasis non raoe pan, a napan hikta antoen ne a tavus o te' totoopin manih pa matan e Sosoenēn, manih pa ma taate' vapenpen, ke', manih pa ma vu taate' va pa èsës a ma he'. Manih pe Ieesu' varoe kuru, ne Sosoenēn se hiuk a ma hat pea. Suk e' to va'aus a ra, pa ö ne' to tavus vamanih pa te' èsës he', pare' te' tamoaan non manih pa papmatö pe Sosoenēn, E' to vih non, pea se kēh a ma taate' moaan pea, ko vaho' ovodes rakah o vaman pea manih pe Ieesu'.

A ma kiun varih to tataki va ne manih pan,

E Sosoenēn to vateera' koe voh ea manih pe koa' pe', 1:1-4

A tasun pe Kristo to apuh oah e non pa tasun pa ma ankero' pe Sosoenēn,
1:5-14; 2:1-18

A tasun pe Kristo to apuh oah e non pa tasun pe Mosēs, pen Josua', 3:1-19;
4:1-13

A tasun pe Kristo to apuh oah e non pa tasun po te' èsës he', 4:14-16; 5:1-14;
6:1-20; 7:1-28

Manih pe Ieesu', o vatompoan voon to apuh oah e non po vatompoan
vamoaan, 8:1-13; 9:1-28

O era' pe Kristo to kikis oah e non po era' po vöna', o era' pamēh se hiuk
rakah en pa ma hat pea, 10:1-39

Manih po vaman varoe ne ea se tavus o te' totoopin pa matan e Sosoenēn,
11:1-40

Manih pa taate' te' vaes pea, ea se vaman no e Kristo, ko pënton no eah.
12:1-29; 13:1-19

A soe ataaton pe tökiun po kiun vēh, 13:20-25.

A Soe Pe Sosoenën To Koe Ma' Pe Koa' Pe'

1 ¹Moaan voh ne Sosoenën to vavaato koe me voh non a kën sipuura manih po te' vanënën soe. Pa ma poen peo ne' to vavataare koe voh non ea pa taate' tata me a taate' vaato. ²Ivëhkëk, manih pa ma poen to oah ee, e' to vavaato koe me a rora pe Sunai'eah. E Sosoenën to vaneah voh e Sunai'eah a ma tah kurus. Ee pon to te' val'peh ne, pare soe, ko oeh me akis tavus me a ma moeh tah kurus to te' hop ne nën. ³E Koa' to matan va e non manih pe Tamaneah, pare' vaseaapen non o maaka pe'. O kikis pa soe pe' to vatoe me non pe Tamaneah, pare öt ne pon a ma moeh tah kurus pa soe kikis pamëh. Vasuksuk ne' to mët, ko era' pe' pupui a ra ko vahik a ma hat pea, ka voon rakah ee. Manuh pa vöön va kin, ne' to iho' non pa papmatö pe Tamaneah a Kikis Vi. ⁴A tasun pe Ieesu' to apuh oah e non pa tasun po ankero'. E Sosoenën to he' voh poan o éhnän to apuh oah e non pa ma éhnëëre.

A Tasun Pe Koa' To Apuh Oah E Non Pa Tasun Po Ankero'

⁵Ivëh, ke Sosoenën hikta soe ke voh ta pah ankero' a soe ne' to he' e Ieesu' to soe non pan,

“Kuru, één e Koa' peö!, keö! e Tamömah.”

Sng 2:7

Ahik to pöh poen ne Sosoenën to soe ke ro ankero', ivëhkëk, e' to soe ke Ieesu' pan,

“Eö! se te' no' e Tamömah, kën te' nom e Koa' peö!”

2 Sml 7:14

⁶Ivëhkëk, o poen ne' se vanö hah ma' a pah Koa' ro pe' manih po oeh, pare' soe pan,

“A ma ankero' pe Sosoenën se vasunön eah.”

Sng 97:7

⁷Ke Sosoenën to sosoe suk voh non o ankero', pare' soe pan,

“Eö! to nok voh raoe, kee te' ne a nap kiu peö!,

pare te' va ne manih pa tuvh me o tékrea.”

Sng 104:4

⁸Ivëhkëk, manih pe Koa', ne Sosoenën to soe pan,

“Sosoenën, a ma tamoaan rakah nën se te' nom a te' Sunön,

parën matop nom a ma napan pën pa taate' totoopin.

⁹Eën to iu nom a taate' vih totoopin,

parën rës nom a taate' hat.

Ivëh, ke Sosoenën e Topoan pën to kon voh oah, ko he' oah o vaeö,

me a tasun to te' oah e non pa ö ne' to he' vavoh a ma vakamö' pën.”

Sng 45:6-7

¹⁰Ke Sosoenën sosoe suk voh non e Ieesu', pare' soe pan,

“Eën e Sunön, po vamomoaan één to nok o oeh me akis pa koreomah.

¹¹O oeh me a akis se hat vamanih po rara vamoaan, pare hik ee.

Ivëhkëk, één to te' tamoaan e nom.

¹² Eën se nikun raoe vamanih po rara,
 parën panih raoe pon vamanih pa te' to panih o rara,
 ivéhkék, eën se vatoe tamoan e nom,
 parën hikta se manot nom." Sng 102:25-27

¹³ E Sosoenën to hikta soe ke voh ta ankero' a soe ne' to he' voh e
 Ieesu', to soe non pan,
 "Iho' manih pa papmatö peö!',
 ke' antoen pa ö nö' se vaho' a te' to vakihat me a nom oah manih
 paan in eën." Sng 110:1

¹⁴ O ankero' to kiu ne paan e Sosoenën, ke' vavanö non raoe pa va'aus o
 te' varih ne' se kon hah.

E Sosoenën to Kon Hah A Ra

2 ¹Ivëh, ka se pënton vavih rakah a soe man vëh na to pënton, suk
 ea toma' kékéh amamot nö hah e no pa soe man, ko kékéh e Koa' pe
 Sosoenën. ²A soe man vëh no ankero' to he', e' o Vavaasis pe Mosës.
 Ketereh to pënton varo a soe pamëh, ee se kon kamis ee. A kamis pamëh,
 e' to te' totoopin e non. ³Ivëh, ke ea me se keh pënton varo ee pa soe
 apean pe Ieesu' se kon hah a ra, ea hikta onöt no a rusin kékéh a kiiki pe
 Ieesu'. E Ieesu' koman to soe voh ken pea, pa ö se' kon hah a ra. Ko te'
 varih to pënton voh ne poë to soe pan, a soe va'ih to te' man e non. Ea
 me to pënton a soe vëh to soe non pan, e Ieesu' se kon koe hah a ra pa
 ma vaasis po te' varih. ⁴E Sosoenën to vataare me en pan, a soe pamëh to
 man pa ö ne' to he' a napan a ma vu vëknöm me o kikis apuh. Manih pa
 ma napan ne' to nok a ma vu tah vatoksean. E' to he' vakékék raoe a ma
 he' pa Tuvuh Vasio' pa ö ne' to iu va non.

E Ieesu' to Kon Hah A Ra

⁵Ivëh, ke Sosoenën to hikta vate' voh o ankero', pan ee se matop ne a
 pop pa napan. A pop pamëh na to vavahutët suk no. ⁶Suk manih po Puk
 Vapenpen pe Sosoenën, e' to sosoe suk non e Sosoenën pa ö ne' to kiun
 va non pan,

"Suk ataaeh, ka napan te' oah ne manih po kokoman pën,
 kën matop nom raoe?"

⁷Eën to vöknah raoe,
 kee te' ne paan o ankero',
 ivéhkék, eën to vasunön hah raoe,
 parën he' raoe a tasun me o kikis.

⁸ A tasun va pa matop a ma tah." Sng 8:4-6

Ka soe pamëh to soe non pan. E Sosoenën to nok voh o te' se matop ne
 a ma tah kurus manih po oeh. Ivéhkék, kuru na to hikta ep no o te' to
 matop ne a ma tah poë varih. ⁹Ivéhkék, ea to ep voh ee pe Ieesu'! E' to

vöknah voh ea ko kunah ma' manih po oeh, pare' mët. Manih po poen pamëh, e' to vapaan ke non o ankerö!. Manih po ururuan pe Sosoenën, e' to kon kamis ko mët suk voh a napan kurus, pare' kon en po éhnän apuh.

¹⁰E Sosoenën, e' a Te' to nok voh a ma tah kurus, me e' to matop non a ma tah kurus poë varih. E' to iu non a ma napan peo se nö manuh pa vöön va kin. Ivéh, ke' vate' en pe Ieesu' se kon koe hah a ma napan kurus, pa ö ne' to kon kamis voh. E' to tavus voh a te' totoopin pa ö ne' to vatet voh a taate' pamëh.

¹¹E Ieesu' to vavoon hah a ma napan, ke'e', me a ma napan varih to voon hah, ee to te' nee a pah tamëëre. Ivéh, ke Ieesu' hikta te' poet voh non, a poka' raoe a kén kea pe!. ¹²Ivéh, ke' soe pan,

“Sosoenën, eö' se vavaato suk no' a oah manih pa ma kea peö!.

Eö' se soe vavaeö ka oah manih pa ma vakum.”

Sng 22:22

¹³E' to soe pet en pan,

“Eö' se vaho' hah ö' pa koren e Sosoenën,”

Ais 8:17

pare' soe hahah kov en pan,

“Eö' ivéh to te' me no' po koa' ne Sosoenën to he' a neo!”

Ais 8:18

¹⁴O te' poë varih, to te' me ne o sionin. Ivéh, ke Ieesu' tavus va en manih pee. E' to tavus te', ko mët pare' sun hah. A tah pamëh to vöknah o kikis va pa mët ne susun po ora' hat to te' me voh non. ¹⁵E Ieesu' to tavus te', pare' mët ko sun hah ko voen hah raoe. Ee to nanaöp ne a taate' mët. Ivéh, kee te' va e ne manih po te' kikiu akuk. ¹⁶E' to maaka rakah en, pa ö ne' to hikta nö voh ma' pa va'aus o ankerö!, ivéhkëk, e' to nö ma' pa va'aus o pus koa' pe Abraham. ¹⁷Ke Ieesu' tavus va en manih pa ma kea pe' varih, a napan. Ivéh, ke' tavus en a Te' Susun po Te' Ësës He' to te' me non o ururuan, pare' vavatet non a soe pe Sosoenën. Ko nonok non a kiu pe!. Ke Sosoenën se ihan anoe a ma hat pa ma napan. ¹⁸E Ieesu' koman to kon kamis voh, pa ö ne susun po ora' hat to pupunö' voh non poan. Ivéh, ke' se va'aus en po te' varih, ne susun po ora' hat to pupunö' non raoe.

A Tasun Pe Ieesu' to Apuh Oah E Non Pa Te' Tasun Pe Mosës

3 ¹Ivéh, kén kea vivihan peö!, e Sosoenën to vate' a neöm a ma te' koman pe', ke eöm se nö manuh pa vöön pe' vöö kin. Eöm se vavatet nem e Ieesu' vöö ne Sosoenën to va nö ma!, ke' te' non a Te' Susun po Te' Ësës He' vöö, na to vaman no ko kë no a éhnaneah. ²E Ieesu' to vavatet vavih rakah e non po iu pe Sosoenën, vamanih pa ö ne Mosës to nonok vavoh non. E Mosës to nonok voh non a ma tah ne Sosoenën to iu non, pare' matop non a napan va Israël. ³A te' to eok a iuun to kon o éhnän apuh, to apuh oah e non pa iuun ne' to eok. E' to vatoe e non pe Ieesu' to kon voh pa tasun to apuh oah e non pa te' tasun pe Mosës. ⁴A ma iuun kurus to te' ne, a te' to eok. Ivéhkëk, e Sosoenën to nok voh a ma moeh

tah kurus. ⁵E Mosës to vavatet voh non o iu pe Sosoenën. Pare' vanënën non a ma tah ne Sosoenën to sosoe non, se tavus amot. Pare' nonok non a kiu manih pa iuun pe Sosoenën. ⁶Ivëhkëk, e Kristo, e' e Koa' pe Sosoenën. E' to te' me non a kiu va pa matop a napan, ka napan to te' va ne manih pa iuun pe Sosoenën. Ea se te' no a napan pe', pa ö na se keh ötöön vakis no o vaman pea manih pe Ieesu!, ko anoeh no eah, ke! öök po poen na se mët.

⁷Ivëh, ka Tuvuh Vasio' soe pan,

“Po poen nöm to pënton a soe pe Sosoenën,

⁸paröm nat nem te' va nem manih po te' vatösue,
vamanih pa ö nöm to pënton varo vavoh nem e Sosoenën,
vamanih pa ma sipuineöm to te' voh ne pa moeh upin, ko
pupunö' a ne neo!”

⁹E Sosoenën to soe koe manih pa Tuvuh Vasio' pan,

“A kën sipuineöm to pupunö' voh a ne neo!

Ivëhpëhkëk, ee to ep voh e ne pa ma tah nö' to nonok no' po 40 kirismas.

¹⁰E' a pusun in a tah, nö' to heve suk voh no' raoe,
suk a ma kokoman pee to te' ke voh e ne.

Kee vatösue e ne pa ma soe peö'.

¹¹Eö' to vovoh parö' soepip vakis rakah eo' pee pan,

‘Eöm se nat nem nö' pa vanot manih pa muhin va Keenan vëh, nö'
se he' a neöm.’” Sng 95:7-11

¹²Kën kea peö', eöm se matop nem po kokoman hat peöm. Eöm to vanun o vaman peöm, paröm këh ke e Ieesu!, e Sosoenën to'to' tamoaan.

¹³Eö' to hikta iu no' ta paeh va peöm se vatösue non, ka taate' hat vanun a neöm, köm taum a punis. Ivëhkëk, a ma poen kurus nöm se te' nem, eöm se vava'aus hah a nem pa vaman a soe pe Sosoenën. ¹⁴O poen na to taneo vaman e Ieesu! ko vavatet eah, para vaman no eah, e' se va'aus en pea. Ivëh, ka se keh vaman vakis avoe' rakah e no pe', ea se vatös me eah pa ma tah koman pe', po poen ne' se hah ma'!

¹⁵Iva'ih a tah no Puk Vapenpen to soe suk voh non,

“Kuru eöm se tënán a soe pe Sosoenën,

paröm koe a vatösue vamanih pa ö no a kën sipuineöm to pënton varo vavoh ne e Sosoenën.” Sng 95:7-8

¹⁶A napan varih ne Mosës to me tavus këh voh ma' raoe a muhin va Isip, to he' tonun voh e Sosoenën, pa ö nee to pënton varo a soe pe!. ¹⁷A napan poë varih ne Sosoenën to heve voh non raoe po 40 kirismas. E' to heve voh non o te' varih to nonok hat voh ne, pare mëtmët ee manih pa koman a moeh upin. ¹⁸Ke Sosoenën soe vakis hah va en manih pan, “Ee voh ivarih a napan to pënton varo voh a soe peö’. Ee hikta se tavus ne manih po oeh vëh, nö' se he' raoe, kee kon a vanot.” ¹⁹Ivëh, ka nat ee pee

to hikta vaman vakis voh ne e Sosoenën, to tavus manuh pa ö ne' se he' raoe, kee kon a vanot.

4 ¹E Sosoenën to soe vaman voh ken pea, pa ö na se ho ee pa vöön va pa vanot. Ivëh, ke ea se matop rakah no ko naöp no e Sosoenën tome' kiiki a ra, pa ö na to vatösoe no ko hikta tavus manuh pa vöön va pa vanot. ²Ea to pënton voh ee pa soe vih vamanih pa ö no a napan va Israël to pënton vavoh. Ivëhkék, ee to pënton varo, pare hikta vaman voh ne ko hikta ho manuh pa vöön va pa vanot. Ka soe vih pamëh hikta va'aus voh raoe. ³Ivëh, ke ea varih a napan to pënton para vaman no e Sosoenën, ea varoe to se ho manuh pa vöön vavanot va'peh me e Sosoenën. Suk ataaeh, e Sosoenën to soe suk voh o te' to pënton varo, pare' soe pan,

“Eö' to heve voh parö' soepip raoe, ko soe pan,

‘Ee se nat ne nö pa vanot manih pa muhin va Keenan, vëh
nö' se he' raoe.’” Sng 95:11

E Sosoenën to soe voh a soe pamëh, e' he vamatop vahik a vöön vanot pe' po poen ne' to nok o oeh, ke' öök non kuru. ⁴Ivëh, ka manih komön o Puk Vapenpen to kiun va non manih pan,

“Po tönim me o pöh poen ne' to nok a ma moeh tah,
pare' vavuriah en komön o tönim me o pöök poen.

E Sosoenën to nok vahik en pa ma moeh tah,
pare' vavuriah en po poen pamëh.” Jen 2:2

⁵E Sosoenën to vavaato avoe' suk e non pa pah soe, ko soe pan,

“Ee se nat ne nö pa vanot manih pa muhin va Keenan, vëh
nö' se he' raoe.’” Sng 95:11

⁶A napan varih to pënton voh ee pa soe vih, pare hikta ho voh pa vöön va pa vanot, ee to hikta ho voh, suk ee to hikta vaman ne a tah ne Sosoenën to soe voh ke raoe. A nap têtënan soe ne Sosoenën se vaonöt raoe, kee ho ee pa te' va'peh me poë. ⁷Ivëhkék, e' to vate' en po meoh poen vëh na se nö ko vanot. Moaan voh manih pa ö ne' to vavaato koe no ma' pa rivon e Devit, ke' kiun koman o Puk Vaëhëh pan,

“Eën se keh pënton a rivon e Sosoenën kuru,
koe a pënton varo.” Sng 95:7-8

⁸Ivëh, ka nat e no e Josua' se keh me ho voh en pa napan pa vöön va pa vanot, e Sosoenën hikta se vavaato amot suk hah non to meoh poen vanot. ⁹Ivëh, ka nat e no po meoh vanot pa napan pe Sosoenën to te'
avoe' e non. E' to te' va non manih pa ö ne' to vanot vavoh pa ö ne' to nok vahik o oeh manih komön o tönim me o pöök poen. ¹⁰A te' to vanot en pa ö ne' to mët, e' to te' va non manih pe' to vahik en pa kiu pe'. A vanot pamëh to te' va non manih pa ö ne Sosoenën to vahik voh a kiu pe', ko vanot en. ¹¹Ivëh, kuru ne ea se kiu vakis pa ho manih pa vöön va pa vanot va'peh me Sosoenën. Ea se koe a pënton vamanih pa ö nee to pënton varo vavoh, pare hikta ho voh pa vöön va pa vanot.

¹² A soe pe Sosoenën to kikis vi, pare' to'to'. E' to kakakni oah e non po rapis rë kakakni vapon. A soe pamëh se ruk rakah en po kokoman, me o iu, me o hahaha' pea, vamanih po rapis rë. E' to vateera' rakah en pa ma taate' pea. ¹³ Ahik rakah ta pah tah manih po oeh se vakoan in e Sosoenën. A pop pea manih po oeh ne Sosoenën to nat vavih e non pe', ivëh, ka se vamaaka a ma tah na to nok voh manih pe!.

E Ieesu' E Susun Po Te' Ësës He'

¹⁴ Ivëh, ka se ötöön vakis o vaman pea manih pe Ieesu', pe e' e Susun po Te' Ësës He' to nö voh manuh pa vöön va kin. Ke' te' non e Koa' pe Sosoenën ko te' vatët tamoaan non pa havineah. ¹⁵ A Te' Susun po Te' Ësës He' pea e Ieesu', e' to inan e non pa ma punö' to tatavus a rora, ka hikta onöt no vöknah a ma punö' poë varih. Ivëh, ke' se va'aus en pea, suk a ma taate' punö' poë varih to tavus voh ee manih pe!. Ivëhkëk, e' to hikta nok rakah voh ta pah hat. ¹⁶ Ivëh, ka se koe a naöp pa ö na to nö vatët manuh pe Sosoenën vëh to ururuan a rora sih. Ka se vaman vakis no e Ieesu', para hin hin vatëh no eah, ke' se va'aus a ra pa ma punis na to te' me no.

A Te' Susun Po Te' Ësës He' E Ieesu', To Onöt E Non Pa Kon Hah A Ra

5 ¹ Ivëh, ke Sosoenën vate' a ma Te' Susun po Te' Ësës He', to kiu ke ne a napan pa he' a ma he' vaeö pee manuh pe Sosoenën. Me ee to nok a taate' ip vamët o vöna', ko ës ke na e Sosoenën pa vahik a ma hat pa napan. ² A Te' Susun po Te' Ësës He' to te' akuk vavoh e non nén, ivëh, ke' vava'aus non o te' varih to hikta maaka ne pan, a tah nee to nonok ne, e' a tah hat. Ivëh, ke' he' a va'aus tö manih pa napan poë varih, suk e' koman to hara' voh en pa taate' punö!. ³ Ivëh, ko Te' Susun po Te' Ësës He' koman, to te' me e ne pa ma te' hat pee, pare ësës e ne na pa ma vöna' koman pee, me pa napan pa vahik a ma hat koman pee, me a ma te' hat pa napan. ⁴ Me a hikta te' ësës he' to vate' koman hah ea vamanih pa Te' Susun po Te' Ësës He', suk e' to iu kon non a tasun apuh pamëh, Ahik, e Sosoenën varoe to vaoe a te' ke' tavus en a Te' Susun po Te' Ësës He' vamanih, pa ö ne Sosoenën to vate' vavoh in e Aron me o vute' pe!. ⁵ E' to te' akuk va kov e non manih pe Kristo to hikta vate' koman hah voh ea, pan e' a Te' Susun po Te' Ësës He', suk e' to iu kon non a tasun apuh pamëh. Ahik. Ivëhkëk, e Sosoenën to vate' voh poan, ko vanënën suk poan manih po Puk Vaëhëh pan,

“Eën e Koa' peö!,

kuru eö' e Tamömah.”

Sng 2:7

⁶ Manih pa meh soe, komön o Puk Vaëhëh ne Sosoenën to soe pan,

“Eën se te' nom a te' ësës he' va pa ma tamoaan.

Eën se te' nom a te' ësës he' vamanih pa ö ne Mëlkipëtëk

me o vute' pe' to te' vavoh ne."

Sng 110:4

⁷E Ieesu' to te' to'to' avoe' voh e non manih po oeh, pare' hinhin vakis rakah voh non, pare' okook non e Sosoenën se va'aus poan ke' nat non mët. Suk ataaah, e' to vöknah voh ea, ko vavatet non o iu pe Sosoenën. Ke Sosoenën pënton en pe', pare' vaeh poan ke' hikta nanaöp non a mët. ⁸Ivëhkëk, e Ieesu' to te' ro voh e non e Koa' pe Sosoenën, e' to kon kamis voh en, ko kamis pamëh, to vavaasis poan pa vatet a taate' pënton soe pe Tamaneah. ⁹O kamis me a sun hah pe Ieesu' to vapuh vavih poan, ke' tavus voh en a te' se kon hah a ra, ka te' va'peh me no eah po to'to' tamoaan, ea o te' varih to pënton no eah. ¹⁰Ke Sosoenën soe vatvus voh en pe', pare' soe pan, e' a Te' Susun po Te' Ësës He' vamanih pa ö ne Mëlkisetëk, me o vute' pe' to te' vavoh ne.

Ea Se Nat No Te' Va No Manih Po Si' Koa'

¹¹Eö' to te' me no' a ma tah peo vihvih to hiva' ne pa vamaaka, nö' se soe ka neöm, suk a Te' Susun po Te' Ësës He' vëh, e Kristo. Ivëhkëk, eöm to hikta kokon vamaaka oho' nem, parööm hikta onöt nem a vatet. ¹²Eöm to tavus voh em o te' to vavatet nem e Ieesu'. Ivëh, köm se vavaasis pet a ma meh te' a soe pe Sosoenën vëh nöm to pënton voh, ivëhkëk, eöm to hikta nok voh. Ivëh, ka meh te' se vavaasis hah a neöm a pusun o vavaasis vamomoaan va pa soe pe Sosoenën. Eöm se pënton o vavaasis eh to te' va non manih pa te' se een en pa taëen eh, ivëhkëk, eöm to rës avoe' e nem vamanih po te' to vameme' ne. ¹³Ivëh, ko te' to hikta kokon vamaaka oho' ne o vavaasis eh pamëh, ee to te' va e ne manih po te' to vameme' ne, pare te' va e ne manih po koa!. Ee to hikta nat ne pa taate' totoopin heh nee se suk, me a taate' hat heh nee se koe. ¹⁴O vavaasis eh to te' va non manih pa taëen eh. A taëen eh, e' a taëen pa nap apa'puh, nee to vaasis hah rea, pare inan pataeah to te' vih non me a tah hat, ko vatet a tah to te' vih non.

Ea Se Te' Vakis No Ko Anoeh No E Sosoenën Se Vavih A Ra

6 ¹Ivëh, ka se nat no te' avoe' no manuh po vavaasis vamomoaan suk e Kristo. O vavaasis vamomoaan pamëh to te' va non manih po vavaasis pa te' vameme!. Ea se te' va no manih pa te' natsean to vavaasis, ko iu avoe' e non pa kon a ma meh vavaasis suk e Kristo. Ivëh, ka se nat no te' avoe' no manuh po vavaasis vamoaan suk e Kristo, o vavaasis pamëh to kunkuin a komaara, pan ea se he' tonun a ma taate' to hikta te' me ne o to'to' man manih pee, me ea se vaman e Sosoenën. ²A ma vavaasis vamomoaan suk e Kristo, ivarih, a ma vavaasis va pa taate' vapupui no o Jiu' to vatet ne,^a me a vaho' a koreera manuh pa pasun a te', me o

^a 6.2 a taate' vapupui no o Jiu' to vatet ne. A ma taate' po Jiu' va pa vavoon a napan pa taate' vauhu po Jiu', e' to te' ke e non pa pupui vëh na to vavatet no kuru.

vavaasis va pa mët me a sun hah, me o vavaasis va pa kiiki a ma napan va po to'to' tamoaan. ³Ivëh, ko vaman pea se nönö nö non, ko tavus na pa ö na se kon o vavaasis natsean, vamanih pa ö ne Sosoenën to iu va ka rora.

⁴A napan varih to pënton voh ee pa soe pe Sosoenën ko vaman ee, ivëhkëk, ee to hahah ee po vavaasis vamomoaan suk e Kristo, e'e to hikta onöt rakah ne a panih, ko vaman hah a soe nee to pënton voh. Ee to kon voh a Tuvuh Vasio' vamanih po he' pe Sosoenën pa nok a kiu pe!. ⁵E'e to nat voh ee pa ö no a soe pe Sosoenën to vih va non. Pare hara' voh ee po kikis pe Sosoenën se matop amot e non pa ma napan. ⁶A napan poë varih se keh hah ee po vavaasis vamomoaan suk e Kristo, ee to hikta onöt rakah ne a panih hah ma!. Suk ataaeh, a taate' hah manuh pa taate' vamoaan to vatoe va e non manih pee to ni hah ee pe Koa' pe Sosoenën manih pa kuruse. A tah pamëh to te' va non manih pa ma meh te' to vavovoeak hah ne e Ieesu' vamanih pa ö nee to nonok moaan vavoh ne pa ö ne Ieesu' to han voh non pa kuruse.

⁷O upöm te' to te' va ne manih po oeh ne Sosoenën to vanö ma' a uhön ke' vavih o oeh ka ma moeh taëen pupu vavih ne nën ka napan ènëen ne. ⁸Ivëhkëk, o upöm te' to te' va e ne manih po oeh to te' me non o meon to'to', o meon to'to' se keh pu topnin a ma taëen, ee hikta se te' vih hah ne. O oeh se keh hikta vavoa' vavih a taëen e Sosoenën se mirö' en pe!.

⁹Ivëhkëk, eöm a ma vamomhë peö', emöm to hikta koman nem a soe vapipino' va po oeh hat to huh a non neöm. Emöm to nat e nem pan, eöm to kon a tapui o pöh apuh, ke Sosoenën se kon hah a neöm, ivëh, köm nonok nem a ma kiu vihvih va pa va'aus a napan. ¹⁰E Sosoenën a totoopin tamoaan, e' hikta se anoë non o iu nöm to vataare nem manih pe', pa ö nöm to nok a ma kiu va'aus vih varih nöm to nonok tamoaan nem manih po te' varih to vaman ne e Ieesu!. ¹¹Emöm to iu suntan rakah nem pan, eöm se vavatet rakah nem a taate' vih vëh, ke' öök na po poen no a ma tah na to anoeh no, se tavus vaman. ¹²Ea hikta se te' no o te' karauh, ivëhkëk, ea se vatet a kiu vih no te' va po vaman to nok voh, para vaman, ko anoeh no, ko kon a ma tah vih ne Sosoenën to soe vaman voh.

Ea Se Vaman No A Soe Man Pe Sosoenën

¹³Ivëh, ke Sosoenën soe vaman ke voh e Abraham pa ö ne' se nok o vatempoan pa tah ne Sosoenën se nok. Suk ahik voh ta te' to apuh oah non o kikis pe Sosoenën. Ke Sosoenën vate' a èhnaneah pa nok o vatempoan pe' pen Abraham. ¹⁴E Sosoenën to soe ke Abraham pan, "Eö' to soe vaman voh ka oah a ö nö' se tapui rakah a oah, ko he' a oah a ma pus koa' peo." ¹⁵A ma tamoaan ne Abraham to te' voh non pa taate' anoeh, pare' kon en pa ma tah ne Sosoenën to soe vaman ke voh poan.

¹⁶Ivëh, ka te' se keh iu non a soe pe' se man rakah, e' se pokal' a meh te' no a èhnaneah to apuh oah non a èhnaneah, ka soe man

pamëh se vatö o kokoman pa te', ivëh, ka taate! heve se nat non te' non topnin a poa te'. ¹⁷E Sosoenën to kehkeh vamaaka voh ke non o te' varih to se vaneah a ma tah ne' to soe vaman voh. E' hikta se panih hah non a soe vaman pe!. Ivëh, ke' vaho' a soe kikis pa tah ne' to soe vaman ke voh raoe. ¹⁸E' to te' non a poa tah man varih, a soe kikis me a soe vaman ne Sosoenën to hikta se panih rakah non. E Sosoenën hikta se piuk non manih pa ö ne' to soe a soe vaman pe!. Me Sosoenën hikta se piuk non manih pa ö ne' to soe a soe kikis pe!. Ivëh, ka napan varih to panih a taate' hat moaan pee, ko he' rea manih pe Ieesu', se anoeh ko ötöön vakis ne o vaman ne' to he' raoe. ¹⁹Ea to te' me no a taate' anoeh manih po kokoman pea vamanih pa anka' to ötöön non o parö' ke' atan non. O vaman pea manih pe Ieesu' se te' eh non, suk o vaman pamëh to me ho a ra pa rum vapenpen vëh to te' non tonun o rara rë.^b Ivëh, ka se huk vatët manuh pe Sosoenën vöh pa vöön va kin. ²⁰E Ieesu' to vovoh ho ka ra manuh pa vöön va kin. Vamanih pa Te' Susun po Te' Ësës He' va pa ma tamoaan, me vamanih pa ö ne Mëlkipisëtök me o vute' pe' to te' vavoh ne.

E Mëlkipisëtök E' A Te' Ësës He'

7 ¹Ivëh ke Mëlkipisëtök, e' a te' sunön va vöön Salëm. Pare' te' non a te' Ësës he' pe Sosoenën Kikis Vi. E Abraham to hah tane' ma' po vapus pa ö ne' to vapus, ko vöknah a ma te' sunön, me a nap vëvënsun pee. Pare' akeh e Mëlkipisëtök manih hanan, ke Mëlkipisëtök tapui en pe!. ²Ke Abraham ki en pa ma tah, pare' he' en pe Mëlkipisëtök pa ma papaeh va pa ma havun tah ne' to ip këh po te' susunön pare' kon ma!. A pusun in o éhnän vëh, e Mëlkipisëtök ivëh, "A te' sunön va pa taate' totoopin." Suk ataaeh, e' a te' sunön va Salëm, ko éhnän vëh a te' sunön va Salëm to soe non pan, "A te' sunön kamö!" ³Ahikta kiun to soe vanat non pan, e Mëlkipisëtök to te' me voh non e tamaneah pen sinaneah, me ahikta ö to soe vanat non o poen ne' to koa' voh ma!, me o poen ne' to mët. E' me voh ahikta ma sipuneah. E'e' me to te' va e non manih pe Koa' pe Sosoenën, pare' te' non a te' Ësës he' va pa ma tamoaan.

⁴Eöm se ep a ö no a tasun apuh pe Mëlkipisëtök to te' va non. E Abraham e sipuura to te' vavoh non nën. E'e' to kon voh a ma papaeh va pa ma havun tah ne' to kon voh pa ö ne' to ip këh voh pa ma te' susunön, pare' he' e Mëlkipisëtök, suk a tasun apuh pe!. ⁵A kën sipun e Livaë, varih o te' Ësës he' to vatet ne o Vavaasis pe Mosës, pa öt a ma papaeh va pa ma havun tah manih pa ma te' poëëre varih a napan va Israël. Ivëhpëhkëk, e'le a ma pus koa' pe Abraham. ⁶E Mëlkipisëtök to hikta te' voh non pan,

^b **6.19** O rara rë to han pip non a paeh rum vapenpen koman a Iuun Hin hin Apuh po Jiu!. Ka Te' Susun po Te' Ësës He' varoe se ho po paeh poen komön o pöh kirismas. E Ieesu' me to ho pa ö vapenpen vöh pa vöön va kin pa va'aus a ra, ka huk vatët manuh pe Sosoenën.

e' a te' va po vute' pe Livaë. Ivéhkék, e' to öt voh en pa ma papaeh va pa ma havun tah manih pe Abraham, pare' tapui en pe Abraham a te' to vaman voh a soe vaman pe Sosoenén. ⁷Ea to nat e no pa te' vöh to tapui a meh te', e' to kikis oah e non pa te' vöh to kon a tapui. ⁸Manih po te' ësës he' e'e to ötöt ne a ma papaeh va pa ma havun tah. O te' poë varih to mëtmët voh ee. Ivéhkék, a te' vöh e Mëlkisëték to öt a ma papaeh va pa ma havun tah to te' tamoan e non vamanih, pa ö no Puk Vapenpen to soe va non. ⁹O vute' pe Livaë to kokon voh e ne pa ma papaeh va pa ma havun tah. Ivéh, ka antoen e no pa soe vamanih pan, o Livaë to he'he' koe voh ne manih pe Abraham, ke Abraham he' pet a ma papaeh va pa ma havun tah pee manuh pe Mëlkisëték. ¹⁰E Abraham to akeh voh e Mëlkisëték, e Livaë he me' avoe' voh e non pa koa' ma' po poen ne Abraham to he' e Mëlkisëték a ma papaeh va pa ma havun tah pe'.

E Ieesu' To Te' Va E Non Manih Pe Mëlkisëték

¹¹Moaan voh a taate' va pa kiu pa te' ësës he', me o Vavaasis pe Mosës to tane' voh ma' manuh pe Mosës, ko öök ma' manih po Livaë. Ivéh, no a napan va Israël to vavatet suk hah ne o Vavaasis pe Mosës no te' ësës he' po Livaë to vovoh ne. O te' ësës he' va po vute' pe Aron se keh te' totoopin voh ne, e' hikta se te' hah non to meoh vu te' ësës he', se te' va ne manih po vute' pe Mëlkisëték. ¹²O kikis va po Vavaasis pe Mosës to tane' ma' manih pa taate' va pa kiu po te' ësës he'. Ko meoh vute' se keh kon a kiu pa te' ësës he', a kiu pa te' ësës he' pamëh nee to vavatet moaan ne, se panih en. Ivéh, ko kikis va po Vavaasis pe Mosës se panih me en. ¹³Ivéh, ke Ieesu' e Sunön pea no a soe pe Sosoenén manih po Puk Vapenpen to vanënën suk voh non poan pan, e' a te' va po meoh vute' ke. O vute' pamëh to hikta öt voh ne a taate' va pa kiu pa te' ësës he'. ¹⁴E Sunön pea e Ieesu' e' a te' va po vute' pe Juda!. Ivéh, ke Mosës hikta soe voh ta pah soe manih po vute' poë varih se kon a kiu pa te' ësës he'.

¹⁵Ivéh, ka nat vamaaka ee, pa meh te' ësës he' voon e Ieesu' to tavus en. E' to vatoe va e non manih pe Mëlkisëték. ¹⁶E' to hikta tavus te' ësës he' vavoh manih pa ö ne' to tavus tane' ma' po vute' po te' ësës he'. Ahik. E' to tavus voh a te' ësës he' manih po kikis va po to'to' tamoan. ¹⁷Manih pa ö no Puk Vapenpen to soe va non,

“Eén se te' nom a te' ësës he' va pa ma tamoan,

vamanih pa ö no vute' pe Mëlkisëték to te' vavoh ne.” Sng 110:4

¹⁸Ivéh, ka taate' moaan va pa kiu pa te' ësës he' na se vahik eah, suk ataaah a taate' pamëh to hikta te' kikis onöt non pa va'aus a napan, kee te' totoopin ne pa matan e Sosoenén. ¹⁹Pe' a taate' kiu pa te' ësës he' po Livaë to hikta onöt voh non a vatotoopin a ma hat pa napan. Ivéhkék, a kiu pa te' ësës he' vöh e Ieesu' to vih oah e non pa taate' va pa kiu pa te' ësës he'. A meh kiu pa te' ësës he' vöh e Ieesu', ivéh, e' to vatvus a taate' anoeh, ka huk vatët ee manuh pe Sosoenén.

²⁰E Sosoenën to soe voh a soe kikis, pa ö ne' to vate' e Ieesu' pa kiu va pa te' ésës he'. Moaan voh a hikta soe kikis no Livaë to vate' voh manih pa kiu pa te' ésës he'. ²¹Ivëhkëk, e Ieesu' to tavus a te' ésës he' pa soe kikis ne Sosoenën to soe vamanih pe' pan,

"Eö' e Sunön to soe a soe kikis peö!,

parö' hikta se panih hah no' o kokoman peö!.

Eën se te' nom a te' ésës he' va pa ma tamoaan."

Sng 110:4

²²Ivëh, ke Ieesu' vapuh en po vatompoan voon topnin e Sosoenën me a napan pe!. O vatompoan pamëh to te' vih oah e non po te' vatompoan vamoaan, suk e'e to hikta vavatet voh ne.

²³A napan to tatavus te' ésës he' voh ne, pare mëtmët këh e ne pa kiu pamëh. Pare hikta onöt ne a nok varë a kiu pee. ²⁴Ivëhkëk, e Ieesu' to te' tamoaan e non, ka kiu pe' hikta se panih non, vamanih po Livaë, o te' ésës he'. Ivëh, ke' hikta se he' non ta meh te!. ²⁵Ivëh, ke Ieesu' onöt e non pa nok a kiu pa te' ésës he' pa va'aus tamoaan a ra, a napan varih to hinhin koe ne e Sosoenën manih pe Ieesu!. Suk ataaeh, e' to te' tamoaan me e non pe Sosoenën, pare' hinhin ke non pea.

²⁶Ivëh, ke Ieesu', e' a Te' Susun po Te' Ësës He', pare' onöt e non pa va'aus a ra. Suk e' a vivihan no a hikta pah hat to te' non manih pe!. E' a vivihan no a taate' pe' to te' ke e non pea a nap nonok hat, ka éhnaneah to te' oah e non pa ma moeh tah kurus varu pa vöön va kin. ²⁷E' to hikta te' va non po upöm Te' Susun po Te' Ësës He', e' to hikta iu non a taate' va pa he' me a és ke na e Sosoenën o vöna' pa ma poen kurus, pa vahik a ma hat pa napan, me e' koman. E' to he' vavoh in manih po he' manuh pe Sosoenën. ²⁸O Vavaasis pe Mosës to sosoe voh non pan, o Livaë se vate' a Te' Susun po Te' Ësës He' pa nok a kiu pamëh. Ivëhkëk, a kiu pee to hikta kikis onöt non a vahik a ma hat pa napan. Ivëh, ke Sosoenën soe voh a soe kikis se tavus amot ma' manih pa taate' va pa vate' e Koa' pe' Ieesu'. E koa' pamëh no kikis pe' to onöt e non pa vahik a ma hat pa napan. E' a vivihan, pare' te' tamoaan e non.

E Ieesu' A Te' Susun Po Te' Ësës He' Va Pa Vöön Va Kin

8 ¹Ival'ih, a pusun in a ma soe nö' to he' varu' a neöm. Ka te' me e no pa Te' Susun po Te' Ësës He' vëh to iho' non pa papmatö pa ö ihiho' vasio' pe Sosoenën. ²A te' ésës he' pea e Ieesu', to kiu non pa ö vivihan te'te' pe Sosoenën, no a hikta te' to nok voh.

³O te' susun po te' ésës he' to te' ne pa he' a ma he' me a és ke na e Sosoenën o vöna'. Ka Te' Susun po Te' Ësës He' pea e Ieesu', to te' me e non po he' ne' se he' na e Sosoenën, o he' pamëh, ivëh e'e' koman. ⁴Ivëh, ke' se keh te' voh non po oeh, e' hikta se te' voh non a te' ésës he' manih po oeh. Suk ataaeh, o te' ésës he' manih po oeh to he' vahik voh ee na pa ma he' to vatet ne a kiu po te' ésës he' varih o Livaë. ⁵A iuun te'te' vah

vēh no te' ēsēs he' to kiu ne koman, to vēknöm non a iuun vivihan te'te'
pe Sosoenën manuh pa vöön va kin. E' to vatoe akuk va kov e non manih
pa ö ne Mosës to ekeok vavoh non a ö te'te' pe Sosoenën, vamanih pa ö
ne Sosoenën to vataare voh ke poan, pare' soe pan,

“Eén se eok suk a ö nö' to vataare vavoh ka oah manuh kin pa tope.”

Eks 25:40

6 Ivéhkék, a kiu pa te' ēsēs he' ne Ieesu' to kon voh, to apuh oah e non
pa ma meh te' ēsēs he', me e' a te' vatopnin. E' to te' akuk va kov e non
manih po vatompoan voon ne' to nok topnin e Sosoenën me a napan pe'.
Suk ataeah, a ma soe vaman vakuru ne Sosoenën to he', kee te' vavih oah
e ne pa ma te' vamomoaan.

7 O vatompoan vamoaan pe Sosoenën me a napan se keh te' onöt voh e
non pa vahik a ma hat pa napan, e Sosoenën hikta se iu hah non to meoh
vatompoan. **8** Ivéh, ke Sosoenën taum voh a ma hat manih pa napan pe',
pare' soe voh pan,

“Amot nö' se nö' ma',

ko nok o vatompoan voon me ra napan to te' ne pa muhin va Israël,
me o vute' pe Juda'.

9 O vatompoan pamëh hikta se te' va non manih po te' voh pa kën
sipuiire.

Manih pa koreneo', nö' to me tavus këh ma' raoe pa muhin va Isip.
E'e to hikta matop voh ne o vatompoan möm to nok voh.

Ivéh, nö' to he' tonun suk voh raoe.

10 O vatompoan nö' se nok me a napan va Israël ivéh,
eö' se vate' a taate' peö' manih po kokoman pee,
parö' kiun eah manih pa komëäre,
kee se pënton a soe, ko vatet a taate' peö',
eö' se te' no' e Sosoenën pee,
kee se te' ne a napan peö'!

11 Ahikta paeh va pee se vavaasis non o upöm pee,
suk ataeah ee se nat e ne peö',
taneo no ma' po koa',
ko öök no ma' pa nap apa'puh.

12 Eö' se ururuan a ma taate' hat pee,
parö' ihan anoe eo' pa ma hat pee.”

Jer 31:31-34

13 E Sosoenën to vavaato suk non o vatompoan voon, pare' soe pan,
“O vatompoan vamoaan no a napan to hikta matop voh ne.” Ivéh, ke
Sosoenën soe pan, o vatompoan pamëh to vamoaan ko se hik en.

A Te' Susun Po Te' Ūsēs He' Vamoaan To Ūsēs Voh Non O Vöna'

9 **1** O vatompoan vamomoaan to te' me non a ma taate' va pa kë a
ëhnan e Sosoenën no te' ēsēs he' to nok manih koman a topa vasio'

te'te' vah manih po oeh. ²A topa vasio' te'te' vah nee to eok, ka ö vëh mahën to te' non a ö toktok po vau', me a pok, ka manih pa pok to te' non a taëen nee to he'he' ne na e Sosoenën. Ko te' ësës he' varoe to ënëen ne. ³Ka manih tonun a ö vapenpen nee to vahan pip a ö vasio' te'te' pe Sosoenën po rara papanö!. ⁴Manih pa tonun o rara pamëh to te' non a pok vapenpen nee to mon voh po völs gol, pare ësës ne a ma tah vavuh vih nën. Pare' te' non a pokis nee to mon po völs gol. A pokis pamëh to te' non a mana' to te' hop non pa nöh nee to nok pa gol, me o toknon pe Aron to veoh voh en,^c me a poa ta völs to kiun non a havun soe vaënpa pe Sosoenën. ⁵Tonun a pokis to te' non a poa ankerö' varih, a ëhnëëre o Sérupim to vëknöm ne a ö vasio' te'te' pe Sosoenën. Ka poa paknëëre va'na'töön ne a ö nee to tatapui ne o era' po vöna' va pa vahik a ma hat pa napan. Ivëhkëk kuru, na se hikta vahutët vörep suk no a ma tah poë varih.

⁶Iva'ih, a ö no a ma tah to te' vavoh ne, a te' ësës he' se ho manuh pa ö vamahën pa nok a kiu pe!. ⁷Ivëhkëk, a Te' Susun po Te' Ësës He' to se ho oah manuh pa koman a ö vasio' te'te' pe Sosoenën pa nok a kiu pe' po pöh poen komön o pöh kirismas. E' se te' ho o era' po vöna' ne' se he' na manuh pe Sosoenën, pa vahik a ma hat pa napan nee to hikta koman ne a nok, me a ma te' hat koman pe!. ⁸Ivëh, ka Tuvuh Vasio' vavaasisa vamaaka en pea, pa ö no a ma tah varih to te' va ne manuh pa topa vasio' te'te' vah. Ka hanan va pa ho manih pa Ö Vasio' Oah to hikta taperet voh non pa ö no a topa vasio' te'te' vah vamoaaan to te' avoe' voh non. ⁹A taate' va pa vaës o vöna' vamanih po he' to vataare a ra pan, e' to hikta onöt non a vavivihan o to'to' po te' varih to kë ne a ëhnan e Sosoenën. ¹⁰A ma taate' va pa pupui a ma tah varih, taëen, ruen vih kakaak, vapupui koren, me a taate' ësës vöna', e'e a ma tah va po sionin varoe to hikta onöt ne a va'aus o to'to' pea. Ivëhkëk, a ma tah poë varih to te' anoeh ro voh ne a ö ne Sosoenën se panih en pee manih po vatompoaan voon.

¹¹Ivëhkëk, e Kristo to nö vavoh ma' manih pa Te' Susun po Te' Ësës He', pare' panih en pa ma tah vamoaaan to te' voh ne, e' to panih en pa taate' va pa ës o vöna', me a he' a ma he' manuh pe Sosoenën. Manuh pa vöön va kin a iuun vasio' to te' apuh oah e non, pare' totoopin, no hikta te' to nok voh. A tah vih ivëh, e Kristo to mët ko sun hah, pare' nö nën pa nok a kiu pa Te' Susun po Te' Ësës He', pare' panih en po vatompoaan vamoaaan. ¹²E Kristo to voen hah a ra po era' pe', pare' he' a ra o to'to' tamoaan. Pare' ho manuh pa iuun vasio' vöh pa vöön va kin po pöh poen ro. Ivëhkëk, e' hikta te' o era' va po vöna' pa he' vamanih po he!. ¹³O era' pa meeme', me a purmakaö' apuh, me o kukuvun in a purmakaö' sekä' nee to ës. Pare varapök manih pa napan varih to te' me ne a ma hat, ka

^c 9.4 Ep na po Puk Nampa!, 17:6-10 to sosoe non a ö no toknon pe Aron to veoh voh en.

ma hat tera' varoe pa napan to hik ee. Ivëhkëk, o era' pe Kristo to kikis oah e non po era' pa vöna!. O era' pe Kristo to ihan anoe a ma hat tera', me a ma te' hat kokoaan pa napan. ¹⁴A tah vëh to tavus man en pa ö ne Kristo to vapuh en pe' po era' pe!. A Tuvuh Vasio^d to va'aus poan manih pa ö ne' to he' ea manuh pe Sosoenën vamanih po he' vih vivihan te'te' tamoaan. O era' pe' se pupui a ma kokoman vakoaan pea, ka koe a ma taate' hat moaan poë varih, se me en pea pa mët. Ivëh, ka se nonok no a kiu pe Sosoenën to'to' tamoaan.

¹⁵Ivëh, ke Kristo kiu non topnin o vatempoan voon po te' varih, ne Sosoenën to vaoe se kon a tapui te'te' tamoaan, ne' to soe vaman voh. A tah vëh se tanok suk e Kristo to mët, marën a voen hah raoe, pare' vahik en pa ma hat pa napan to te' voh ne paan o vatempoan vamoaan. ¹⁶A te' se keh kiun en pa soe vaonöt pa tah ne' to vaneah non no a meh te' se kon, ahikta te' to onöt non a kon, ke' öök non po poen ne tövaneah se mët. Po poen ne' to maaka pan, e tövaneah to mët en, a meh te' to onöt e non pa kon a ma tah varih pa ö no a soe vaonöt to soe va non. ¹⁷A soe vaonöt pamëh to hikta te' non ta tah pa ö no a te' to kiun a soe vaonöt to te' to'to' non. A te' vëh no a soe vaonöt to vaonöt ke poan, e' se kon varoe pa ö no a te' pamëh to kiun a soe vaonöt to mët en. ¹⁸Ivëh, ko vatempoan vamomoaan to te' vaeh koe voh non manih po era' in o vöna!. ¹⁹Vamomoaan ne Mosës to soe ke ra napan a ma taate' pe Sosoenën. Pare' kon o era' pa meeme' me a purmakaö! seka!, ko hovën pa ruen, pare' tai ma' a popoko' naon, ko pöm po kuri, ko varu na pa nam era', pare' kon hah, ko rapis a napan va'peh me o puk vëh no a soe pe Sosoenën to kiun non. ²⁰Ke Mosës soe pan,

“Iva'ih, o era' to vaeh non o vatempoan ne Sosoenën to he' voh a neöm,
näm se vavatet nem.”

Eks 24:8

²¹E' to nok pet va en nën manih pa iuun te'te' pe Sosoenën, me a ma moeh tah varih nee to kë ne a ähnan e Sosoenën. ²²Manih po Vavaasis pe Mosës to soe non pan, a ma meh tah, me a ma hat pa napan na to pupui vavoon nö no po era' po vöna!. Ivëh, ke Sosoenën hikta onöt non a ihan anoe a hat pa napan, pa ö no era' se keh hikta tako!.

O Era' Pe Kristo To Pupui Vavoon A Ra

²³Ivëh, ka ma tah kurus varih koman a topa vasio^d pamëh, ^d nee se pupui vavoon po era' po vöna!, to vëknöm ne a ma tah to te' ne pa vöön va kin. Ivëhkëk, a ma tah va pa vöön va kin to iu ne o era' to te' vih oah rakah non. ²⁴Ivëh, ke Kristo to ho voh en pa vöön va kin pa iuun vapenpen pe Sosoenën, a iuun pamëh no a hikta te' to eok. Ivëh, ke' te' ka no ma' ra

^d 9.23 [...] E' a ö ne Sosoenën to te'te' non.

manuh pa vöön va kin va'peh me Sosoenën. ²⁵O Te' Susun po Te' Ësës He' po Jiu', to oho voh ne pa piprom vivihan va'peh me o era' po vöna', po pöh poen komön o pöh kirismas, pa ma kirismas kurus. Ivëhkëk, e Kristo to hikta he' vapeo o era' pe!. ²⁶Ivëh, ke Kristo hikta kon kamis vapeo voh, taneo non po poen ne Sosoenën to nok o oeh, ke' öök non po poen vëh kuru. E' to koa' voh ma' manih po oeh, ko mët ko sun hah, pare' hikta se mët hah non. Ahik rakah. E' to tavus manih po poen vëh kuru pa ö ne Sosoenën to vaeh o vatompoan voon. E Sosoenën to vaeh o vatompoan voon pa ö ne' to vanö ma' e Kristo, ke' he' ea vamanih po he' to ihan anoe non a ma hat kurus pa napan. ²⁷Ea se mët a paeh mët ro, ko vasuksuk ne Sosoenën se kiiki a ma hat na to nok. ²⁸Ivëh, ke Kristo mët voh en, ko he' ea vamanih po he' va pa ihan anoe a ma hat pa napan kurus. E' to hikta se vapöök mët hah non, suk a ma hat pa napan. Ivëhkëk, e' se hah en ma' pa kon hah o te' varih to vamatop ko anoeh ne a hah pe!.

A Ma He' Vamoaan To Hikta Vahik Non A Ma Hat

10 ¹O Vavaasis pe Mosës to te' vavoh non manih po vëknöm akuk in a ma tah se tavus amot ma!. Ivëhkëk, a ma he' varih nee to he'he' ne pa ma pah kirismas hikta onöt ne a vavivahan o te' varih to nö ne manuh pe Sosoenën pa vasunön eah. ²A vöna' ës se keh onöt e non pa vavoon a ma napan, ivëh, ko te' ësës he' hikta se ësës hah ne o vöna!. E Sosoenën se keh ihan anoe rakah en pa ma taate' hat pa napan kurus varih to nönö ne ma' pa vasunön eah, a, a napan poë varih se tavus vavoon ee pa pah he' ro, pare hikta se teen hah ne ta hat. ³Ivëhkëk, a ma he' poë varih nee to he'he' ne pa ma pah kirismas pa vahik a ma hat pee, a ma he' poë varih to soe vanat hah varoe non raoe a ma hat pee. ⁴Suk o era' pa meeme' ke' a purmakaö' to hikta onöt non a vahik këh raoe a ma hat pee. ⁵Ivëh, ka tëäm ne Kristo to iu nö voh non ma' po oeh vëh, e' to soe ke Tamön a soe vëh no a te' vanënën soe to kiun voh, ko soe pan,

“Eën to hikta iu hah nom o era' va pa vöna' no a te' ësës he' se he' vamanih pa ma vu he'!

Ivëhpëhkëk, eën to he' a neo' o sionin vamanih po he' va pa vahik a ma hat pa napan.

⁶ Eën to hikta vaeö hah me nom o vöna' varoe nee to ësës ne manuh pa pok vapenpen,
vamanih po he' va pa vahik a ma hat.

⁷Kuru eö' to soe vamanih,

‘Eö' ivëh e Ieesu', se vatet eo' po iu pën, Sosoenën.

Vamanih pa ö nee to kiun suk vavoh ka neo' po Puk Vapenpen.’”

Sng 40:6-8

⁸E' to soe momoaan en pan, e' to hikta iu hah non a ma vöna' nee to ësës ne manih pa pok vapenpen, vamanih po he' va pa vahik a ma hat.

E'e' to soe ro voh en, ivëhkëk, o Vavaasis pe Mosës to soe vakis avoe' e non pan, e'e se ësës vöna' avoe' e ne. ⁹Pare' vapöök soe ken pe Sosoenën pan, "Eö' se vatet eo' pa ma tah nén to iu nom." Ivëh, ke Sosoenën to vahik en pa taate' vamoaan va pa ës o vöna', pare' vate' varu' en po he' voon va pa vahik a ma hat pa napan. ¹⁰E Ieesu' Kristo to vatet voh o iu pe Sosoenën, pö ne' to he' a sionineah, ko mët suk a ra pa paeh tëäm ro. Ivëh, ka tavus ee o te' vivihan.

¹¹O te' ësës he' po Jiu' to susun ne pa nok a kiu pa ma poen kurus. Ivëhkëk, o vöna' poë varih nee to he'he' ne vamanih po he' to hikta se vahik non a ma hat pa napan. ¹²Ivëhpëhkëk, e Ieesu' to he' paeh ro voh ea vamanih po he', to te' vih oah e non pa taate' va pa ës o vöna', pa ö ne' to mët ko sun hah, pare' iho' non pa papmatö pe Sosoenën. Suk a kiu va pa voen hah a ra to hik en. ¹³Kuru e Ieesu' to iho' non pa papmatö pe Sosoenën, pare' anoeh avoe' e non po poen ne Sosoenën se vaho' o te' varih to vakihat me ne poë, kee vapaan ke ne poë. ¹⁴Ivëh, ke Ieesu' to mët a paeh tëäm ro, ka tah pamëh to nok a ma napan, kee tavus ee o te' vivihan va pa ma tamoaan.

¹⁵A Tuvuh Vasio' to soe tavus momoaan voh en manih po Puk Vapenpen pan,

¹⁶"E Sosoenën to soe pan, 'Iva'ih o vatompoan nö' se nok me raoe. Amot nö' se kiun a ma taate' peö' manih po kokoman pee.

Me eö' se vaho' manih po to'to' pee."

Jer 31:33

¹⁷Pare' sosoe avoe' e non pan,

"Eö' hikta se koman hah no' a ma hat pee me a taate' vatösöe pee."

Jer 31:34

¹⁸Ivëh, ka taate' va pa ës o vöna' va pa vahik a ma hat, ne Sosoenën to hikta iu hah non. Suk a ö ne' to ihan anoe vahik voh en pa ma hat poë varih.

Ea Se Huk Vatët Manuh Pe Sosoenën

¹⁹Ivëh, kén kea, manih pa mët pe Ieesu', ea to te' me no po vaman, ko hikta se naöp no a huk vatët manuh pa ö vapenpen oah te'te' pe Sosoenën. ²⁰Moaan voh o rara to han pip voh non a ö te'te' pe Sosoenën koman a Iuun Hin hin Apuh. O rara pamëh to tasi vakëh po poen ne Ieesu' to mët pa kuruse. Ivëh, ke Ieesu' to peret ka ra a hanan voon va pa huk vatët manuh pe Sosoenën, pa ö ne' to mët ko sun hah, pare' te' to'to' tamoaan e non. ²¹Ivëh, ka te' me e no pa Te' Susun po Te' Ësës He' to matop a rora a napan pe Sosoenën. ²²Ivëh, ka se huk vatët ee manuh pe Sosoenën, me o vaman kikis, va'peh me o pöh kokoman, suk o to'to' pea to voon va en manih pa ö na to vahu pa ruen maaka. ²³Ea se öt vakis o vaman pea ko anoeh no o va'aus pe Sosoenën, suk ea to vaman no a ö ne' se suk en pa soe man pe!. ²⁴Ea se koman no a ma meh te' pea va po

vaman, ko vakikis hah a no, para nok a taate' iu te', me ea se nok a ma taate' vih manih pa topniira. ²⁵Ea se koe a vakah a taate' te' vatönun pa vasunön e Sosoenën pa taate' hin vamanih pa ö no upöm te' to nonok va ne sih. Ivëhpëhkëk, ea se vakikis a ma meh te' pea va po vaman, ka se te' kikis no po vaman, ko anoeh no o Poen apuh ne Ieesu' Kristo se nö ma' pa kiiki a ma napan.

²⁶Ahik hah ta hanan va pa vahik a hat pa ö na to nat e no pa soe man na to kon voh ee. Ivëhpëhkëk, ea se keh he' tonun avoe' e no pe Ieesu', me a Tuvuh Vasio', ka hik hah ta meh hanan va pa vahik a hat pamëh. ²⁷Ivëh, ka ma te' to pëntöñ voh ee pa soe vih pe Sosoenën, pare he' tonun avoe' e ne, a napan poë varih ne Sosoenën se kiiki en pee, suk a ma taate' hat pee. Ka nap hat vatösöe ne Sosoenën se vanö en pee po sura' èsës tamoaan. ²⁸O te' to vatösöe ne, ko hikta vavatet ne o Vavaasis pe Mosës, ivëh ka pöök, ke' a kukön te' nat i raoe, pare vavatët raoe manih po te' pëpëntöñ vahutët, kee ip vamët ee pee, me ahik to ururuan. ²⁹E Sosoenën se po' nok vah va in a te' vëh nih no era' pe Ieesu' to vavoon poan, ke' he' tonun e Koa' pe Sosoenën, me a vaörakuk o era' pe Ieesu', me a Tuvuh Vasio'? A te' pamëh se kon kamis oah rakah, suk a taate' vatösöe pe!. ³⁰Ea to nat e no pa soe ne Sosoenën to soe voh manih po Puk Vapenpen, pare' soe pan,

“Eö' se vakmis o te' varih to nonok ne a ma hat,
parö piun koman eo' pa ma hat pee.”

Lo 32:35

Pare' soe pet en pan,

“E Sunön koman se kiiki a ma hat pa napan pe!” Lo 32:36; Sng 135:14
³¹Ivëh, ka soe pamëh to va'naöp non a napan ne Sosoenën to'to' tamoaan se keh öt raoe ko vate' raoe po vahutët.

³²Eöm se nat nem anoe a ma poen vamoaan, moaan voh ne eöm to nat e nem pa soe pe Sosoenën, paröm panih a ma taate' hat peöm, a taate' panih peöm nöm to kon kamis suk voh em. Ivëhkëk, eöm to öt vakis voh em po vaman peöm. ³³A ma pöh poen nee to vasun voh a neöm pa matëëra napan pa vöknah a neöm, ko vakmis a neöm. Ka ma meh poen me nöm to te' hop voh e nem pa ma te' varih, nee to nonok vahat ne raoe. ³⁴Ivëh, köm kon kamis va'peh me voh em po te' nohnöh, paröm te' vaeö e nem, po poen vëh ne to kon këh a neöm a ma tah nöm to vaneah nem. Pe' eöm to nat e nem pa tah vih, ivëh, o to'to' tamoaan to anoe e non ma' peöm manuh pa vöön va kin. ³⁵Ivëh, köm se koe a vakah o vaman peöm manih pe Ieesu', suk ataaeh, e Sosoenën se he' amot en peöm po voen apuh va pa vöön va kin. ³⁶Eöm se te' me nem a taate' anoe pa ö nöm to vätet nem o iu pe Sosoenën. Ivëh, ke eöm se kon em pa ma tah ne' to soe vaman voh ka neöm. ³⁷Ivëh, ke Sosoenën soe vamanih komön o Puk Vapenpen pan,

“E' hikta se te' rë non, ka te' vëh ne Sosoenën to vate' se nö en ma!.

³⁸ A napan peö' varih to vavatet ne a taate' totoopin,
 ee se te' to'to' tamoaan e ne, suk e'e to öt vakis ne o vaman pee.
 Ivéhkëk, a paeh va pee se keh tarih hah manuh pa ma taate' moaan
 pe',
 ko he' tonun a neo',
 eö! hikta se te' vaeö va'peh hah me no' eah." Hab 2:3-4

³⁹ Ivéhkëk, ea hikta te' hop no po te' varih to ahah ne pa ma taate'
 moaan pee. Ee se ro po sura' ésés tamoaan. Ivéhpéhkëk, ea to te' me no o
 vaman manih pe Ieesu', ke' kon hah en pea.

A Taate' Vaman

11 ¹Ka taate' va po vaman to te' va non manih, ea to nat vavih va e
 no manih pan, a tah na to anoeh no se tanok, e' se tanok en. Ea
 to hikta ep avoe! no pa tah pamëh na to nat no pan, e' se tanok, ivéhkëk,
 e' se tanok amot en. ²Ivéh, ka manih po vaman pe sipuura ne Sosoenën
 to vaeö me raoe, suk ee to vaman ne a soe vaman pe!.

³Manih po vaman pea, ea to maaka e no pan, e Sosoenën to nok voh a
 akis, me o oeh manih pa soe varoe ko pe!. Ivéh, ka ma tah varih na to ep
 no, ne Sosoenën to nok tane' manih pa ma tah na to hikta onöt no a ep.

⁴E Ebel to vaman voh a soe vaman pe Sosoenën, ivéh, ke' he' o he' va
 pa vöna' manuh pe Sosoenën to vih oah e non po te' he' pe kea pe' Keen.
 Manih po vaman pe Ebel, e Sosoenën to poka' voh poan a te' totoopin. Ke
 Sosoenën vaeö in o he' pe!. E' to mët voh en, ivéhkëk, a taate' vaman pe'
 to vavaasis avoe! e non pea pa vatet a taate' pamëh.

⁵E Inök to vaman voh non a soe vaman pe Sosoenën, ivéh, ke' nö en pa
 vöön va kin, e' hikta mët, ivéh, ka napan hikta taum voh poë. E Sosoenën
 to me këh en pe' po oeh, suk a pop pe' to vih pa epep pe Sosoenën.

⁶Ahikta te' se he' vaeö e Sosoenën pa ö ne' to hikta te' me non o vaman.
 A te' to nö non manuh pe Sosoenën, e' se te' me non o vaman, pan e
 Sosoenën to te' e non, ke' se tapui en po te' varih to vaiu ne poë.

⁷E Noa' to vaman voh non a soe pe Sosoenën to soe non pan, a unat se
 mirö' o oeh. Ivéhpéhkëk, a unat to me' avoe! voh e non pa tavus, ke Noa'
 ténan a soe pe Sosoenën, pare' nok en po parö' apuh, ne e' me ra kën tom
 sinan pe' se hop ko te' ne, ko nat ne kon vahat. Manih po vaman pe!, e'
 to vataare a ma taate' hat pa napan. Ivéh, ke Sosoenën poka' en pe' a te'
 totoopin.

⁸E Abraham to vaman voh non e Sosoenën, pare' pënton a soe pe!,
 pare' këh en pa muhin koman pe!, pare' hikta nat non e' nönö non nih.
 A muhin pamëh ne Sosoenën to soe vaman voh a ö ne' se he' poan. ⁹E
 Abraham to vaman voh non pan, e Sosoenën se he' poan a muhin koman
 pe!, ivéh, ke' te' vavoh non manih pa te' va pa meh muhin manih pa
 muhin ne' to te' non. E Abraham, ke Aësak, ke Jekop, to te' voh ne pa ma

iuun te'te' vah. Ke Aësak, me e Jekop to nat e ne pan, ee se kon va'peh me e Abraham a muhin vëh ne Sosoenën to soe vaman voh. ¹⁰Ivëh, ke Abraham to anoeh voh e non o poen ne Sosoenën se eok a vöön eh vëh se te' tamoaan non.

¹¹E Sara' me to vaman voh non pa ö ne' se han koa' en, ivëhkëk, e'e' pen e voe pe' Abraham to manot ee, me e Sara' to vavihu, ivëh, kee hikta onöt ne a vatvus ta koa!. E Sara' to vaman voh e non pe Sosoenën se suk en pa soe vaman pe', ko he' en pee ta koa!. ¹²E Abraham to manot ro voh en, ivëhkëk, e' to vasipun en pa napan to te' peo va i ne manih po vesun varuh akis me manih po kösan va sinten tahi', no a hikta te' to onöt non a äh.

¹³A ma te' varih, e Abraham, me Aësak, me Jekop, to vaman voh ne, pare mët ee. Ee to hikta ep in a ma tah ne Sosoenën to soe vaman ke voh raoe. Ee to me' voh e ne pa vaneah a ma tah poë varih. Ivëh, kee nat e ne pan, ee a nap aun. ¹⁴A napan to sosoe va ne nën to nat e ne pee to vavaiu ne ta te' muhin se vaneah ne. ¹⁵E'e to hikta koman hah ne a muhin vöh, nee to këh voh ma!. Ee se keh koman ne, e'e se hah ee pa muhin pamëh. ¹⁶Ivëhpëhkëk, ee to anoeh voh ne a vöön vih oah pee ipamëh, ivöh pa vöön va kin. Ivëh, ke Sosoenën hikta hara' vapoet non pa ö nee to poka' ne poë e Sosoenën pee. Suk e' to vamatop ken pee pa vöön voon pee vöh pa vöön va kin.

¹⁷E Abraham to vaman voh non, ko he' en pe koa' pe' Aësak vamanih pa vöna' nee se és ke na e Sosoenën. Pa ö ne Sosoenën to punö' poan. E Abraham voh, ivëh ne Sosoenën to he' voh a soe vaman pe!. Ivëh, ke Abraham vamatop voh en pa he' a pah koa' ro pe', vamanih pa vöna' ne' to és ke na e Sosoenën. ¹⁸E Sosoenën to soe vovoh voh ken pe Abraham, "E Aësak se vasipun in a ma napan." ¹⁹E Abraham to vaman non pan, e Sosoenën se vato' hah e Aësak, pa ö ne' se keh ip vamët voh poan, vamanih po he' ne' to és ke na e Sosoenën. Ivëhkëk, e Abraham to kon hah en pe Aësak to hikta mët.

²⁰E Aësak to vaman voh non e Sosoenën. Ivëh, ke' he' voh en pa tapui pe' manih pe Jekop, pen Iso!. A tapui pamëh nee se kon amot a ma tah vihvih.

²¹E Jekop to vaman voh non e Sosoenën, ivëh, ke' he' en pa tapui pe' manih pa poa koa' oete' pe Jeosëp, vamomoaan in a mët pe!. E' he toon hah a non po toknon, pare' hin hin non e Sosoenën se tapui a poa koa' pe Jeosëp.

²²E Jeosëp to vaman voh non e Sosoenën pa ö ne' to vavaato suk non a nö pa napan va Israël se tavus këh a muhin va Isip. E' to soe voh a soe pamëh pa ö ne' to vatët non pa mët, me o soe vanat va pa ö nee se te' a ma soa' pe' pa ö nee se tavus këh a muhin va Isip.

²³E taman me sinan e Mosës to vaman voh ne e Sosoenën, pare hikta nanaöp ne a soe kikis pa te' sunön va Isip. A soe kikis pamëh to soe non

pan, a napan va Israël se ip vamët a ma koa' oete' pee. Ee to ep voh e koa' pee to matan vavih. Ivéh, kee koaan e Mosës pa kukön sivö, suk ee to vaman ne pan, e Sosoenën se vate' poan pa va'aus a napan va Israël.

²⁴E Mosës to vaman voh non e Sosoenën pa ö ne' to apuh ma!. Pare' hikta iu voh non a ö ne semon a te' sunön va Isip se vasinan avoe! i non poan. Ivéh, ke' koe en pa kon a tasun pa te' sunön va Isip. ²⁵Ivéhpékëk, e Mosës to vamatop e non pa kon kamis va'peh me ra napan pe Sosoenën, varih a napan va Israël. Pare' rës e non pa he' tonun e Sosoenën pa kon vaeö pa tëém kökööt, vamanih pa ö no napan va Isip to nonok va ne.

²⁶E Mosës to vamatop voh e non pa kon poet va'peh me ra napan pe Mesaëa!.^e E' to rës voh e non pa öt a moni!, me a ma moeh tah vihvih va pa kaman va Isip. Suk ataaah, e' to ep e non na po voen apuh oah ne' se kon amot ne Sosoenën se he' poan.

²⁷E Mosës to vaman voh non e Sosoenën, ivéh, ke' këh tavus a muhin va Isip, pare' hikta nanaöp non o heve pa te' sunön va Isip. Ea to hikta onöt no a ep in e Sosoenën pa mataara, ivéhkëk, e Mosës to te' me non a taate' vaman, vamanih pa te' to ep in e Sosoenën, ko vaman pe' manih pe Sosoenën to eh. ²⁸E Mosës to vaman voh non pan, e Sosoenën se kon ke a ma koa' oete' vamomoaan va Israël, kee hikta se mët ne, ivéh, ke' vavaasis a ma napan va Israël pan, ee se ip a sipsip vamanih pa ö ne Sosoenën to soe, pare kon o era' pe' ko rëp manih pa ma hopa!. Suk a ankerö se ep in o era' ko hikta se ip vamët non a ma koa' oete' vamomoaan pee.

²⁹A napan va Israël to vaman voh ne pan, e Sosoenën se me tavus këh raoe a muhin va Isip, ivéh, ka naman vëh nee to popoka' ne a Naman Erera' nö vakëh, ka napan suk ee po oeh. Ka nap vëvensun va Isip kehkeh vatet ne raoe, ka naman takök hah ma' ko kopös en pee, kee mëtmët ee.

³⁰A napan va Israël to vaman voh ne pan, e Sosoenën se va'aus raoe, ivéh, kee vavatvi ne a kiikin vös va Jeriko' po tönim me ro pöök poen.

Ke Sosoenën va'aus raoe ka kiikin vös pamëh takök, ko taru vahik en.

³¹E Rehap a köövo te'te'vaasi' moaan voh to vaman non pan, e Sosoenën se kon ke en pe' ke' hikta se mët non, ivéh, ke Rehap va'aus vavih a poa te' to nö pa epep aven pa vöön va Jeriko!. Ke Sosoenën va'aus en pe', ke' hikta mët va'peh me ra napan varih Jeriko' to vatösoe ne e Sosoenën.

³²Eö' to hikta te' me no' ta tëém, nö' se vahutët suk pet no' na a ma te' varih to vaman voh ne e Sosoenën, e Gideon, me Barak, me Samson, me Jëpta!, me Devit, me Samuël, me ra ma meh te' vanënën soe. ³³E'e to vaman voh ne ko vavatet ne e Sosoenën, pare kon a ma tah ne Sosoenën

^e **11.26** E Mesaëa!, e Kristo to me! avoe! voh e non pa koa' po poen ne Mosës to te' non, ivéhkëk, e Mosës to vaman voh non pan, e Mesaëa' se koa' tane' ma' pa napan va Israël. Ivéh, ke' iu te' va'peh me non a napan va Israël, ko kon punis va'peh me raoe.

to soe vaman voh, pa ö nee to vapus pip vaeh suk a napan pee Isaël. Pare onoah a ma napan va pa meh muhin to vakihat me ne e Sosoenën. Pare hinhin ne e Sosoenën se matop non raoe, pare' sunpip ko ötöön a rivooero laëon, kee hikta onöt ne a mirö' ko ëén ta ma paeh pee. ³⁴E'e to vaman voh ne pan, e Sosoenën se va'aus raoe, ivëh, ka sura' hikta ës i raoe, ka ma meh tavus këh ee po te' se ip raoe po rapis rë. E'e ro sunë, ivëhkëk, ee to kon eh hah ee, pare te' eh oah rakah e ne koman a ma vapus me ro upöm te'. ³⁵O köövo to vaman voh ne pan, e Sosoenën se va'aus raoe, ivëh, ke Sosoenën vato' hah en pa ma paeh te' pee to mët voh ee. Ivëhkëk, a ma meoh upöm te' to mët, suk o te' to rës voh ne a taate' vaman po te' poë varih, pare nohnöh voh raoe, ko ip vamët ee pee. Ivëh, ka ma te' poë varih to vaman ne se sun hah, ko te' ne po to'to' vih manuh pa vöön va kin. Suk ee to koe ee pa rusin këh o kamis no te' hat to nonok ne manih pee.

³⁶A ma meh te' va po vaman no te' hat to rëp vavakmis voh raoe po uris, ka ma meh nee to nohnöh po uris eh, ko vaho' raoe manuh pa iuun nohnöh, pare kö raoe. ³⁷O te' hat to tösvös voh a ma meh te' va po vaman, ko so' kukurus a ma meh pee, ko moes kukurus ee pa ma meh po rapis rë. O te' va po vaman to arus voh, pare ohop voh ne a ma kap sipsip me a ma kap meeme'. Ka nap hat nonok vahat voh ne raoe. ³⁸O te' va po vaman varih, to vih oah e ne po te' to nonok vahat ne raoe. Ko te' va po vaman to nönö vah voh kov e ne, vamanih po te' aun koman a moeh totope upin, pare te' voh ne koman o oeh me manih pa ma vëvë.

³⁹A ma te' varih to vaman voh ne. Ivëh, ke Sosoenën poka' raoe pan, ee a ma te' vih vörep. Ivëhkëk ee to me' avoe' e ne pa kon a ma tah vih ne Sosoenën to soe vaman voh. ⁴⁰Suk ataaeh, e Sosoenën to te' me voh non o meoh kokoman to te' vih oah e non, to onöt non a ö na se kon a ma tah vihvih to se va'aus va'peh raoe. Suk ee to hikta onöt ne a kon vovoh këh voh a ra.

Ea Se Nat No E Ieesu', Para Vaman No Eah

12 ¹Ea to te' me no pa ma te' va po vaman varih nö' to vavahutët suk varu' no'. Ee to mët voh ee, ivëhkëk, ee to ut e ne pa pop pea.^f Ivëh, ka se öt vakis o vaman, ka se tavus manuh pe Sosoenën. Ea se öt vakis o vaman pea vamanih po te' to vaveo ne po vavaveo, vamanih pa te' are. Ea se koe a ma taate' hat tome' réhtöön a ra pa tavus manuh pe Sosoenën. ²Ea se kute' no na manuh pe Ieesu', pe e' a pusun in o vaman, pare' vapuh non o vaman pea. E Ieesu' to han non pa kuruse, suk e' to nat e non po vaeö apuh ne' se kon. Ivëh, ke' hikta te' poet voh non

^f 12.1 [Ee to mët voh ee, ivëhkëk, ee to ut e ne pa pop pea.] A ma te' varih to mët, pare ut e ne a pop pea, ee a ma te' vih, ka se koe a naöp raoe.

pa han pa kuruse. Kuru ne' to iho' non pa papmatö pa ö iho' pa te' sunön vëh e Sosoenën, ivëh, ne' to te' suk me non a tasun pa matop a ma moeh tah kurus.

³Ivëh, köm se koman hah nem a ö ne Ieesu' to sun vakis voh e non, pa ö no nap hat to mirö' poë. Ko vaman peöm se te' kikis non manih pe', paröm nat nem koe rom. ⁴Eöm to te'te' nem a ma punis apuh, suk a ma meh peöm to punö' ne pa rëh a neöm manih pa ma taate' hat vamoaan. Ivëhkëk, eöm to me' avoe' e nem pa öök manih pa ö nee se ip vamët a neöm. ⁵Eöm to anoe pö' voh em pa ma soe va pa vaeh o vaman ne Sosoenën to soe voh ka neöm a ma koa' pe', pare' soe pan,

"Koa' peö!",

eën se pënton soe pa ö ne Sosoenën se rëp vavaasis a oah.

Parën nat nom hara' vöknah pa ö ne Sosoenën to kehkeh vatotoopin a nom oah.

⁶Suk ataaeh, e Sosoenën to vavaasis non sih a ma te' ne' to iu non.

Pare' vakmis non a ma koa' pe', suk e' to iu non pan,
ee se te' ne pa taate' totoopin."

Prov 3:11-12

⁷Ivëh, ka se te' ee pa ma punis to te' va ne manih po kamis no a ma tamaara to he' a ra, suk ea to nat e no pa ma tamaara to iu va'aus a rora a ma koa' pee. Suk ee to iu a rora se te' vavih no pa taate' totoopin. ⁸E tamömah se keh hikta vakmis a nom oah, eën to hikta te' nom pan, eën e koa' rakah pe'. Ivëh, kén se te' nom e koa' hikten taman. ⁹Manih pa ma tamaara, e'e to vakmis a rora ka se ta no raoe. Ivëh, ka se te' no paan e Tamaara vöh pa vöön va kin, po poen ne' to vakmis a ra, marën a va'aus a ra, pa ö ne' se he' a ra o to'to' tamoaan. ¹⁰A ma tamaara to vavakmis a rora sih pa ö nee to ep ne to te' vih non. Ivëhkëk, e Sosoenën to vakmis a rora pa ö ne' se va'aus a rora, ka se kon a taate' vivihan koman pe'. ¹¹A ma tamaara se vakmis a ra, suk a tah na to nok vahat. E'e to vatamak ee pea, ka hikta se te' vaeö no. Ivëhkëk, amot ea varih to kon kamis, se kon ee po kokoman tö me a taate' totoopin.

¹²Ivëh, köm se sun vakis ko te' kikis nem po vaman peöm, paröm vaeh nem o vaman pa ma meh te'. ¹³Eöm se te' vatotoopin nem pa ma taate' peöm. Ivëh, ka ma meh te' to hikta vaman vakis ne, se vatet a taate' totoopin pamëh, pare vaman vakis hah e Sosoenën.

¹⁴Eöm se te' vakamö' me nem ro upöm te', paröm punö' pa te' vavivihan. Suk ataaeh, eöm hikta se ep amot nem e Sosoenën pa ö nöm se hikta te' me nem a taate' vivihan. ¹⁵Eöm se matop nem, tome' a ma paeh peöm këh hah o ururuan pe Sosoenën. Ke' eöm toma' tavus

vamanih po meon hat to pu ko mirö' a ma meh tah.^g ¹⁶Eöm se matop nem, ta peah va peöm tome' tavus a te' rëhrëh, me a meh tome' hikta vaman non e Sosoenën vamanih pe Iso!. E'e' to panih a tasun ne' se kon tane' ma' pe tamaneah. E Iso' to he' a tasun pe' pa ö ne' to soe vaonöt vamanih pan, e kea sone' pe' Jekop se kon a tasun pe tamëëre, pa ö ne Jekop se keh he' poan a taëen. ¹⁷Vasuksuk ea to nat e no pe Iso' to iu kon voh non a tasun manih pe tamëëre. Ivëhkëk, e' to hikta onöt non a panih o kokoman pe tamëëre, ivëhpëhkëk, e' to okook voh non pan, e' se kon hah a tasun pe!.

¹⁸Ivëh, köm hikta nö vavoh ma' manih pa ö no napan va Israël to nö vavoh ma', pare tavus e Sosoenën manih pa tope vëh na to onöt no a ep, a éhnan a tope pamëh a tope Saënaë!. A tope pamëh no o sura' apuh to te' voh non, me a popoen apuh to vatvus o naöp, me a ivat apuh to tavus. ¹⁹Ka napan va Israël to ténan a tah to tanih va non manih pa suvin me o vaato pe Sosoenën, to tatane' no ma' tope Saënaë!. Pare hin vakis e pe Mosës pa ö se nat ne ténan hah ta meh soe pe Sosoenën. ²⁰Suk ataeah, ee to nanaöp voh ne a soe vëh nee to ténan,

“Ahikta pah tah se vatiru' manuh pa tope, ta pah tah se keh vatiru',
a napan se tösvös ee pe!”

Eks 19:12-13

²¹E Mosës to naöp voh e non pa tah ne' to ep, pare' soe pan,

“Eö' to naöp vörep rakah e no', ko rikrik e no'.”

Lo 9:19

²²Ivëhkëk, eöm to tavus voh em pa tope vëh na to hikta onöt no a ep, a éhnan a tope pamëh, a Saëon, e' a vöön apuh pe Sosoenën to'to' tamoaan, no ankerö' peo pe' to te' ne pa Jerusalëm voon. O ankerö' varih na to hikta onöt no a éh raoe, ee to vaeö tamoaan ke ne e Sosoenën.

²³Eöm to nö em ma' po vakum vaeö po koa' vamomoaan^h no a éhnëëre to kiun non manuh pa vöön va kin. Eöm to nö em ma' pe Sosoenën, a te' to kiiki non a ma apen a napan kurus. Eöm to tavus em manuh pa apeera nap vih, ne Sosoenën to poka' non raoe a nap totoopin. ²⁴Eöm to nö em ma' manih pe Ieesu', a te' to vatotoopin o vatompoan voon. E' to vavoon a ra po era' to soe vanat a rora a ma tah to te' vih oah e ne po era' pe Ebel. Suk o era' pe Ieesu' na hikta se piun va no manih po era' pe Ebel.ⁱ

^g 12.15 A paeh te' to këh hah o ururuan pe Sosoenën, pare' tavus vamanih po meon hat to pu ko mirö' a ma meh tah. A pusun in a soe pamëh to soe va non manih pan, o meon hat vëh, e' a te' to këh hah o ururuan pe Sosoenën. O meon hat to pu ma', e' a te' pamëh to te' va'peh me non o te' va po vaman. O meon hat to mirö' a ma meh tah. E' a te' pamëh to nok a ma taate' hat, ka ma meh te' ep suk, pare vatet a taate' hat pamëh. Ivëh, ke'e kurus to këh tavus ee po ururuan pe Sosoenën. ^h 12.23 [...] po koa' vamomoaan [...] E koa' oete' vamomoaan manih po Jiu' to kon a tasun apuh oah manih pa koman a kén taman, pare' kokon non a ma tah vihvih oah. A ma koa' kurus pe Sosoenën to te' va ne nén. ⁱ 12.24 [...] o era' pe Ieesu' na se hikta piun vamanih po era' pe Ebel.] A piun po era' pe Ebel to te' va non manih pa ö ne Sosoenën to soe pan, e Keen se taum amot a punis, suk e' to ip vamët e kea pe' Ebel.

²⁵Eöm se matop nem, ko koe a pënton varo e Sosoenën vëh to vavaato non. A ken sipuineöm to pënton varo voh ee pa soe pe Mosës manih po oeh, pare taum ee pa ma punis. Ivëh, ke ea me se taum o punis apuh oah, pa ö na to pënton varo a soe pe Sosoenën, to vavaato tane' e non ma' pa vöön va kin. ²⁶A soe pe' to kö en po oeh, ivëhkék, e' to soe vamanih pan,

“Eö' hikta se kö varoe no' o oeh, a akis me.” Hag 2:6,21

²⁷A soe to soe ka rora pan, a ma moeh tah varih po oeh ne Sosoenën to nok voh se variu ee, ke Sosoenën se panih en pee. Ivëhkék, a ma tah varih to hikta onöt ne a variu, pare hikta se panih ne.

²⁸Ea se te' vivihan no ko vavatet no e Sosoenën, suk ataaeh, ea to te' no paan o matop vih pe'. Ivëh, ko matop vih vëh hikta se variu non, pare' te' tamoaan e non. Ea se hinhin no e Sosoenën, ko he' vaeö no eah, ko vasunön eah, para ta no eah. ²⁹Ea se vaman no a ma soe man pe Sosoenën, suk e'e' to vakmis non o te' to vatösoe ne. A vakmis pe' to te' va non manih po sura' to onöt non a ës vahik a ma tah kurus.

E Sosoenën E Tamaara

13 ¹Eöm se iu nem a ma meh upöm te' vamanih pa ma kea peöm. ²A ma paeh sipuura to vaoe voh ne a ma te' va pa ma meh muhin pa ma iuun pee, ko hikta nat va i ne raoe manih pan, e'e o ankerö! Ivëh, köm se vaoe nem a ma te' va pa ma meh muhin manih pa ma koman iuun peöm. ³Eöm se nat nem o te' varih to te' ne pa iuun nohnoh, vamanih peöm to te' va'peh me e nem pee. Eöm se nat nem o te' varih no o vakihat pee to nok vahat voh raoe, vamanih peöm to kamis va'peh me e nem pee.

⁴O vaen peöm se te' totoopin non, ke voe me köövo se matop vavih ne o vaen pee pon. E Sosoenën se kiiki a ma taate' hat po te' varih to te' ne pa taate' rëhrëh. ⁵Eöm se koe a iu vörep a moni', paröm te' vaeö me nem a ma tah nöm to öt nem. Suk e Sosoenën to soe pan,

“Eö' hikta se këh rakah no' oah, ko anoe a oah.” Lo 31:6

⁶Ea to onöt e no pa vaman a soe to te' non koman o Puk Vapenpen to soe non pan,

“E Sunön to va'aus a non neo!,

ivëh, kö' hikta se naöp no' ta tah no a te' se nok manih peö!”

Sng 118:6

⁷Eöm se nat nem a ö no a ma te' to vovoh voh ka no neöm, to vavaasis voh ne a soe pe Sosoenën, paröm koman nem a ö nee to te' vavih vavoh nee. Ko suk a ö nee to vaman vavoh ne. ⁸E Ieesu' Kristo to vatoe e non nopoopen, kuru, me e' se te' tamoaan e non.

⁹Eöm se nat nem pënton a ma meh vavaasis to te' ke ne. E' to vih rakah pa ma komaara se kon tane' varoe o kikis manih po ururuan pe Sosoenën. A ma komaara hikta se vatet non a taate' va pa ëen a taëen

supon, suk a taate' pamëh toma' rëh ke këh a ra o vaman, ka hikta onöt no a kon va'aus nën. ¹⁰A napan varih o te' ësës he' po Jiu' to vavatet avoe' e ne po vatompoan vamoaan, marën a vasunön e Sosoenën, to hikta onöt ne a kon o va'aus ne Ieesu' to he' a ra pa mët pe!^j

¹¹A te' Susun po Te' Ësës He' to te'te' ho voh non o era' va pa vöna' manuh pa ö vasio' to väknöm ro non a ma hat pa napan to se hik.

Ivëhkëk, a sionin o vöna' nee to ësës voh ne manuh sinten a vöön. ¹²Ke' te' akuk va kov e non pa ö ne Ieesu' to mët voh en ma' sinten a vöön, pa vahik a ma hat pa napan po era' pe!^k ¹³Ivëh, ka se nö ee po vakum pe Ieesu', ko te' va'peh me no raoe, ko poet va'peh me eah pa ö ne' to mët vavoh.^l ¹⁴Ee se koe a vatet o vatompoan vamoaan ko vaman varoe no e Ieesu', suk ataaeh, manih po oeh e' hikta te' non pan, e' a ö te'te' tamoaan pea. Ivëh, ka se ep amot a vöön te'te' tamoaan vöh a vöön va kin.

¹⁵Ivëh, ka se he' vaeö koe no na e Sosoenën manih pe Ieesu' pa ma vaëhëh, na to vaëhëh no na manuh pe Sosoenën. ¹⁶Ea se koe a anoë a nok a taate' vih, me a taate' ururuan, me a taate' vava'aus a ma meh te' pea, suk a ma taate' va'aus, me a ma taate' vih poë varih to he' vaeö ne e Sosoenën.

¹⁷Eöm se vatet nem a ma te' to susun ka no neöm, paröm tënän nem raoe. Suk ee to matop a no neöm, ko to'to' peöm te' totoopin non. Amot ee se he' e Sosoenën o vahutët va pa ma va'aus nee to nok, köm se keh tënän nem raoe, ee se te' me ne o vaeö, pare nok vavih a kiu pee. Ee tome' nonok me ne o tamak ko hikta se va'aus a no neöm.

¹⁸Eöm se hinhin vatëh ka no möm o te' susun peöm, suk a ma kupu pemöm to hara' vavih e ne ko te' maaka e ne, kemöm iu nok tamoaan e nem pa taate' totoopin. ¹⁹Eö' to hinhin vakis a no' neöm kurus se hinhin nem e Sosoenën, ke' se vanö vëhö' hah ma' neo' manem peöm.

O Hin Va Pa Vih

²⁰E Sosoenën to vato' hah e Ieesu', ka manih po era' pe', e' to nok o vatompoan voon te'te' tamoaan topniira, me e Sosoenën. Ivëh, ke' te'

^j 13.10 [...] to hikta onöt ne a kon o va'aus ne Ieesu' to he' a ra pa mët pe!.] A napan to iu vatet varoe ne o vatompoan vamoaan pa tavus o te' totoopin pa matan e Sosoenën, ee me to hikta onöt ne a kon o va'aus manih pe Kristo. Suk ee to koe ee po he' vëh, pa ö ne Kristo to mët pa kon hah këh raoe a hat pee. ^k 13.12 [...] pa vahik a ma hat pa napan po era' pe!.] O era' po vöna', e' o väknöm varoe va pa ö no a ma taate' hat se hik. Ivëhkëk, o era' vëh pe Kristo to te' oah voh e non po väknöm, o era' pe' to vahik rakah voh en pa ma hat pa napan. ^l 13.13 Po poen ne Ieesu' to mët sinten a vöön Jerusalëm, a ma napan to vöknah a ähnaneah, suke ee to koman ne pan, a te' no a nap vëvënsun to ip vamët sinten a vöön, to nok a taate' hat. Ivëh, ka se poet va'peh me e Ieesu', suk ea to kon va'aus pa mët pe!.

non a te' Sunön to matop a rora vamanih pa te' matatop sipsip. ²¹Ivëh, kö' hinhin suk a no' neöm pan, e Sosoenën a kamö' se he' a neöm a matah vihvih nöm to iu nem, marën ö nöm se vatet o iu pe'. Ka manih pe Sosoenën, ea se he' vaeö koe no eah manih pe Ieesu' Kristo. Ke Kristo, na se kë no a ähnaneah pa ma tamoaan. Oman!

²²Ivëh, kën kea, eö' to hi vakis a neöm pa tënán, ko te' me nem o kokoman tö, suk a soe vëh nö' to kiun nös se vaeh o vaman peöm, e' hikta te' rë non. ²³Eö' to iu no' neöm se nat nem pan, e kea pea Timoti' to tavus këh en pa iuun nohnnoh. E Timoti' se keh nö vëvëhö' en ma', kemöm po' nö em nös pa ep a neöm.

²⁴Eöm se he' a soe vavihvih pemöm manih po te' to susun ka ne neöm, me manih pa ma napan pe Sosoenën. A ma kën kea varih pa muhin va Itali' to vanö nös a soe vavihvih pee manih peöm.

²⁵Eö' to hinhin suk a no' neöm pan, o ururuan pe Sosoenën se te' va'peh me a non neöm kurus.